

**Zeitschrift:** Annalas da la Societad Retorumantscha

**Herausgeber:** Societad Retorumantscha

**Band:** 108 (1995)

**Artikel:** Sin via

**Autor:** Pult, Chasper

**DOI:** <https://doi.org/10.5169/seals-236091>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 23.08.2025

**ETH-Bibliothek Zürich, E-Periodica, <https://www.e-periodica.ch>**

# SIN VIA

da Chasper Pult, parsura LR

La nova pagina rumantscha quotidiana, integrada en il Bündner Tagblatt da sonda, ils 22-10-1994, ha accordà a la Lia rumantscha trais clavs d'aur. La raschun ha num: "*La SCUNTRADA an Val Schons era pigls organisatours scu er pigl pievel rumantsch en grond success. La LR ò organiso Workshops, referats, discussiuns da podium scu er otras occurrentzas. Tgera Lia Rumantscha; ia m'alegr sen la proxima SCUNTRADA, dei igl capricorn.*"

## SCUNTRADA 1994 VAL SCHONS

Senz'auter è la SCUNTRADA en Val Schons stada l'eveniment il pli impurtant da quest onn passà. Reunir la Rumantschia e discutar cuminai-vlamain è sa mussà er en la quarta SCUNTRADA dapi 1985 sco occurrentza fitg impurtanta per la Rumantschia.

La SCUNTRADA da quest onn è stada caracterisada dals sequents aspects:

- Il discurs programmatic dal secretari Bernard Cathomas e las occurrentzas sut il titel "Strategias per damaun" han dà l'ensaina da l'engaschament politic cultural a questa SCUNTRADA.
- La giuventetgna è sa participada durant l'emna ed ad in concert da rock istoric la sonda saira en in dumber considerabel, quai che mussa l'interess e l'engaschament.
- Ils radios e la televisiun rumantscha han pussibilità ina participaziun indirecta da la Rumantschia a la SCUNTRADA er senza far la via fin enta Schons. L'eco da la SCUNTRADA è stà considerabel.
- Last but not least ha la vallada da Schons pudì sentir ina fladada rumantscha ed è forsa sa sentida main isolada dal rest da la Rumantschia per in'emna; e las Rumantschas/ils Rumantschs da tut il Grischun han emprendì a conuscher la bella Val Schons e l'ospitalitat e cordialitat da lur abitantas ed abitants.

## 75 onns Lia rumantscha

La Lia rumantscha ha pudì festivar ses 75avel anniversari durant quest onn. Cun ina occurrentza durant la SCUNTRADA ha in vast public pudì sa regurdar u s'infumar en ina nova furma da l'istorgia da questa organisaziun. La Lia rumantscha ha fatg tras in grond svilup en questi decennis ed è in spievel interessant da l'istorgia politica, economica, sociala e culturala dal Grischun. Il giubileum è stà sut l'ensaina da novs tschentaments, acceptads da la radunanza da delegadas e delegads da la stad. Quests tschentaments èn moderns, correspundan a las pretensiuns d'ozendi e cuntegnan en moda explicita la cumpetenza da la Lia rumantscha da

s'engaschar sin tut ils secturs da laver sco ella fa quai dapi lung temp. "S'occupar cun tuttas dumondas da la politica da linguatg en il vast senn e defender ils interess da la Rumantschia" (art. 3, cif. 3) - quai è la nova basa per ina veglia laver.

Blera pazienza pretendan ils temas che Cicero numnass sut "ceterum censeo": Las tentativas da stgaffir ina gasetta dal di e la revisiun da l'artitgel 116 en la constituziun federala. Las lavurs cuntaschan pli plaun che previs. Ma sch'ins avess vulì resignar, sche fiss quai stà pussaivel bleras giadas en ils 75 onns LR, ed era nus avain la speranza ch'ils dus temas vegnan discussiunads vinavant era en l'avegnir e chattian finalmain ina buna fin.

La laver da la Lia rumantscha è caracterisada sco ils auters onns da l'engaschament da tut il persunal en Chasa rumantscha sut la direcziun da Bernard Cathomas e vegn prestada a moda professiunala. A tut las collavuraturas ed a tut ils collavuraturs vuless jau engraziar per l'identificaziun cun la chaussa rumantscha ch'els mussan di per di e che garantescha la credibladad d'ina instituziun che stat en il center da l'interess da las Rumantschas e dals Rumantschs e da la publicitat.

## Elecziuns

Cun la fin da quest onn è ida a fin la durada d'uffizi dal consuprastant Giusep Capaul che ha contribuì durant tut ils 9 onns a formular la laver da la LR ed a surprender responsabladad. Era Jon Domenic Parolini banduna la suprastanza suenter in emprim trienni, perquai ch'el è vegnì elegì nov collavuratur regional da la Lia rumantscha per l'Engiadina. Cun Jon Domenic Parolini e cun Romedi Arquint, anteriuur president da la LR, èn ils dus novs collavuraturs regionals duas personas ch'enconuschan la LR fitg bain e che vegnan a prestar buna laver decentralisada per metter ils postulats en bratscha.

Terminain cun dus traïs patratgs or dal pled final da la SCUNTRADA en Val Schons:

Tuns e suns, vuschs e punts pudess esser stà il motto da la SCUNTRADA - vesì en retrospectiva.

## Tuns e suns, vuschs e punts

- Ils TUNS da chanuns da la battaria d'artigliaria da la scola da recruits dal Monteceneri n'hant betg ans fatg perder il senn per la realitat sco er la serp da la via naziunala 13, la quala taglia permez la Val Schons.
- Ils SUNS musicals differents durant quest'emna mussan la variaziun culturala dals Rumantschs dal musical Pùntcrap, dal Cor maschado da Donat e conturn fin al festival da las gruppas da rock rumantschas.
- Bleras VUSCHS han pudi vegnir a pled, savens era per dir che nus Rumantschas e Rumantschs n'hajan betg ina vusch sufficienta vers noss vischins grischuns e svizzers, ma er na tranter nus.

- E las **PUNTS** - dissegnyadas dals scolars da Schons sin ils bindels en la tenda da festa - èn forsa il simbol da retegnair la SCUNTRADA. Na punts da crap, ma punts umanas che nus vulain crear tranter nus. Per l'emprima giada en l'istorgia da la Rumantschia avain nus ina generaziun giuvna che ha stgaffi las PUNTS sur las regiuns ora, la quala senta dad avair in'identitat rumantscha grischuna (betg anc identitat rumantsch-grischuna, ma tgi sa quant ditg ch'i cuzza anc fin che quest vocal n'ha betg pli da far la differenza!).

Mettain en moviment tuts ensemen quai che nus vulain e quai che nus stuvin metter en moviment. Abraham Gustin, pur a Donat, cun ina fatscha che mussa tut ils tratgs dad ina existenza purila che decida anc sezza sur l'adiever dal temp, ha detg a mai cun tutta loschezza: "*La SCUNTRADA â purto blear*". - Sche la SCUNTRADA ha purtâ bler er a nus tuts, alura è ella stada necessaria.

A la fin da la preschentaziun dals 75 onns LR avain nus tedlà sco Tania e Curo da Vargistagn, in dals cumins da la Muntogna cun 45 abitants dals quals 14 èn anc uffants pitschens, han detg cun tutta naturalezza: "*jou bagliaf bugent rumàntschi*".

Questa fin dals giuvens uffants da Schons ans dat il curaschi necessari da prender per mauns vinavant ils problems ed jau vuless engraziar a tut quels che s'engaschan en ina moda u l'autra per il rumantsch e sia cultura.